

trum tenue eis longius attenuatis, omnium pappo plumoso achenio æquilongo.

Hab. in valle *Mokatteb* Arabiæ Petreæ aliisque deserti locis. (Boiss.) Huc quoque spectare videtur Aucher N° 3411 e *Persia australi* ob flores nondum evolutos subincertum.

Folia pollicem aut amplius longa, caules 3-6 pollicares, capitula eis *P. paucifloræ* majora; species acheniis longè rostratis insignis hæc notà ad *P. longirostrem* Schultz tantum accedens quæ foliis angustè linearibus, caulibus divaricatim ramosissimis, pedunculis apice incrassatis, acheniis rufescentibus etc. discedit.

MILLINA ARABICA Boiss.

M. annua, foliis omnibus radicalibus rosulatis densè et breviter setulosis griseis linearibus pinnatipartitis segmentis brevibus angustè lineari-lanceolatis, scapis procumbentibus vel ascendentibus foliis 2-3 plò longioribus simplicibus vel bicephalis, involucri squamis adpressè imbricatis ab extimis ad intimas lineares sensim elongatis farinoso-puberulis apice nigricantibus, ligulis concoloribus disco sesquolongioribus, acheniis rectis tenuissimè cylindricis sulcatis transversè tenuiter rugulosis rostro setaceo acheniorum marginalium paulò breviori centralium æquilongo terminatis, pappi rostro æquilongi setis 10 basi paleaceo-dilatatis supernè plumosis plumis deciduis.

Hab. in *rabiâ petreâ* ad fines Palæstinæ cum *M. hispidulâ*, legi vere 1846.

Habitus et folia *Picridis radicatæ* Lessing. A *M. hispidulâ* eximie differt foliis abbreviatis angustè linearibus, lobis brevioribus magis æqualibus, indumento griseo setuloso, involucri phyllis regularius imbricatis, acheniis abruptius et tenuius nec sensim in rostrum attenuatis, pappo achenio breviori nec æquilongo.

Pro *Millinâ Persicâ* Boiss. in Diagn. VII p. I lege MILLINA HISPIDULA Boiss. var. *tenuiloba*. Hanc plantam ex speciminibus in Arabiâ petreâ et Ægypto lectis agnosco pro formâ *Crepidis hispidulæ* Del. Æg. tab. 42 fig. I. — *Oporiniæ hispidulæ* DC. quæ foliis plùs minùs incisis ludit. Hæc species omnibus characteribus et imprimis acheniis evidenter et longè in rostrum attenuatis *Millinæ* nec *Crepidis* vel *Oporiniæ* adnumeranda est, inter *Millinæ* sectiones intermedia et eas optimè conjungens.